

Morning Dogri (NSD) National News Bulletin 16-12-2024

आकाशवाणी

1. प्रधानमंत्री नरेन्द्र मोदी होरें सब्बने राज्यें ते केन्द्र शासित प्रदेशों गी आखेआ ऐ जे ओ स्टार्टअप्स गी बधने मठोने ते कम्म करने लेई साजगार म्हौल उपलब्ध करान।
2. प्रधानमंत्री नरेन्द्र मोदी होर अज्ज नमीं दिल्ली च श्रीलंका दे राष्ट्रपति अबूरा कुमार दिसनायके हुंदे कन्नै मलाटी करगंन।
3. राज्यसभा च अज्जै थमां संविधान दे अपनाए जाने दे 75 ब'रे पूरे होने दे सिलसिले च दऊं दिनें दी चर्चा कराई जा'रदी ऐ।
4. गृहमंत्री अमित शाह होरें आखेआ ऐ जे सरकार नै आत्मसमर्पण करने आले माओवादिएं ते नक्सल प्रभावित लोकें दी भलाई बेहतरी लेई इक व्यापक योजना तैआर कीती दी ऐ।
5. 1971 दी लड़ाई च पाकिस्तान पर भारत दी जित्त दे चेते च अज्ज समूलचा मुख्य विजय दिवस मना करदा ऐ।
6. भारत दे महान तबलाबाद जाकिर हुसैन हुंदा 73 ब'रे दी उमरी च काल होई गेआ ऐ।
7. हॉकी च भारत नै चीन गी हराइयै महिला जूनियर एशिया कप 2024 जित्ती लैता ऐ।

<><><><><><>

PM-Chief Secretary Meeting

प्रधानमंत्री नरेन्द्र मोदी होरें सब्बने राज्यें ते केन्द्र शासित प्रदेशों गी आखेआ ऐ जे ओ स्टार्टअप्स गी बधने मठोने ते कम्म करने लेई साजगार म्हौल उपलब्ध करान। प्रधानमंत्री नरेन्द्र मोदी होरें राज्य सरकारें गी गुजारश कीती ऐ जे ओह लौहके शैहरें च उद्यमिएं लेई उचित थाहरें दी शिनाख्त करियै उंदी सुविधा लेई उत्थें विशेष पैहलकदमियां करन। कल नमीं दिल्ली च मुख्य सचिवें दे चौथे राष्ट्री सम्मेलन गी संबोधित करदे होई प्रधानमंत्री होरें राज्य सरकारें गी आखेआ जे ओह प्रक्रियाएं गी बिंद सखल्ला बनान। उनें मुख्य सचिवें गी आखेआ ते राज्यें गी बवस्थाएं च ऐसे सुधार करने लोड़चदे न जिंदे राएं जन भागीदारी गी बढ़ावा मिले। उनें आखेआ जे सुधार, खरी कारकरदगी ते सकारात्मक बदलावें बक्खी ध्यान

केन्द्रित करना जरूरी ऐ ते लोकें गी सरकार दिऐं पैहलकदमिएं बारे जानकार बनाना होर बी मता जरूरी ऐ। ध्यानजोग ऐ जे सीएसआईआर—आईआईआईएम जम्मू आस्सेआ तैआर कीते गेदे उत्पादें गी मुख्ख सचिवें दे इस राश्ट्री सम्मेलन च इक यादगार दे तौर पर भेंट कीता गेआ। केन्द्रीमंत्री डॉ. जितेन्द्र सिंह होरें बी सीएसआईआर—आईआईआईएम जम्मू दी इस उपलब्धि पर खुशी जाहर कीती ऐ। एहदे कन्नै पक्क गै लवेंडर दी खेती कन्नै जुड़े दे करसानें, स्टार्टअप्स ते उद्यमिएं सनं बैंगनी क्रांति गी बी खरा मता बढ़ावा मिलोग।

<><><><><>

Srilanka President

प्रधानमंत्री नरेन्द्र मोदी ते श्रीलंका दे राश्ट्रपति अबूरा कुमार दिसनायके अज्ज नमीं दिल्ली च दपक्खी वार्ता करगंन। ओह आपसी हित दे मुद्दे पर चर्चा करगंन। श्री दिसनायके भारत दी त्रै दिनी यात्रा पर कल नमीं दिल्ली पुज्जने पर सूचना ते प्रसारण राज्यमंत्री डॉ. एल.मुरुगन होरें उंदा सुआगत कीता। ओह राश्ट्रपति द्रौपदी मुर्मू ते उपराश्ट्रपति जगदीप धनखड़ हुंदे नै बी मलाटी करगंन। उंदा बिहार दे बोधगया जाने दा बी कार्यक्रम ऐ। विदेश मंत्री डॉ. एस. जयशंकर होरें श्रीलंका दे राश्ट्रपति हुंदे नै कल नमीं दिल्ली च गल्लबात कीती। इक सोशल मीडिया पोस्ट च डॉ. जयशंकर होरें आखेआ जे श्रीलंका भारत दी गुआंढी पैहल दी नीति ते सागर आउट लुक दौनें लेई महत्वपूर्ण ऐ।

<><><><><>

RS-Debate

मुल्खै च संविधान गी अपनाए जाने दे 75 बरें पूरे होने दे सिलसिले च अज्जै थमां राज्यसभा च दऊं दिनें दी विशेष चर्चा शुरू होग। पिछले शुक्कर ते शनिवारें लोक सभा च बी संविधान पर विशेष चर्चा होई ही ते प्रधानमंत्री नरेन्द्र मोदी होरें एहदा परता बी दित्ता ही। मेद ऐ जे मोदी होर राज्यसभा च कल एहदे पर बैहस दा परता देंगन। 26 नवम्बर 1949 गी संविधान सभा नै औपचारिक तौरा पर संविधान गी स्वीकार करी लैता हा ते 26 जनवरी 1950 गी इसी लागू करी दित्ता गेआ। जेहदे नै भारत इक संप्रभुत्व आला लोकतांत्रिक गणराज्य दे रूपै च स्थापत होआ 2015 च मोदी सरकार नै औपचारिक तौरा पर 1949 च भारतीय संविधान गी अपनाए जाने दे चेते च 26 नवम्बर गी हर बरें संविधान दिवस मनाने दी घोषणा कीती ही।

<><><><><>

Amit Shah-CP

केंद्री गृह मंत्री अमित शाह होरें माओवादियें गी हथियार सुट्टने ते समाज दी मुख्यधारा च शामिल होने दी अपील कीती। रायपुर च छत्तीसगढ़ पुलिस गी मन्ने—परमन्ने दे राष्ट्रपति मिशन प्रेजिडेंट्स कलर सम्मान दित्ते जाने आहले समारोह च अपने संबोधन दौरान श्री शाह होरें आखेआ जे मार्च 2026 शा पैहले छत्तीसगढ़ गी नक्सल मुक्त बनाने दे केंद्र सरकार दे धेइयै गी पूरा करने च छत्तीसगढ़ पुलिस पूरी दिलेरी ते समर्पण भाव कन्नै नक्सल रोधी अभियान चला'रदी ऐ। केंद्री मंत्री होरें आखेआ जे छत्तीसगढ़ पुलिस गी प्रदान कीते गेदा राष्ट्रपति निशान राज्य पुलिस दी सेवा, त्याग ते बलिदान दा प्रतीक ऐ। अमित शाह होरें आखेआ जे सरकार नै आत्मसमर्पण करने आले माओवादिएं ते नक्सल प्रभापत लोकें दी भलाई बेहतरी लेई इक व्यापक योजना तैआर कीती दी ऐ तां जे ओब्बी बिजन कुसै दिक्कत दे इक मानै आला जीन जी सकन।

<><><><><><>

Vijay Diwas

1971 दी लड़ाई च पाकिस्तान पर भारत दी शानदार जित्त दे चेते च अज्ज पूरा मुख्य विजय दिवस मना करदा ऐ। इस लड़ाई दरान अपनी जिंदू दा बलिदान देने आलें गी अज्ज श्रद्धांजलि बी दित्ती जा'रदी ऐ। 1971 च अज्जै दे रोज पाकिस्तान दे लैफ्टिनेंट जनरल ए.ए. खान नियाजी नै अपने 93 ज्हार सैनिकें कन्नै भारती फौज ते मुक्ति वाहिनी दे सामने आत्म समर्पण कीता हा।

<><><><><><>

Zakir Hussain

महान तबलावादक जाकिर हुसैन जंदी रातीं अमरीका च काल होई गेआ। ओह् 72एं ब'रे दे हे। उंदे परोआर आलें जानकारी दित्ती ऐ जे उनेंगी बी.पी सरबंधी किश दिक्कतां हियां ते एह्दे शा पैहले उनेंगी दिलै सरबंधी तकलीफें दे चलदे सैन फ्रासिस्को दे इक अस्पताले च दाखल कराया गेदा हा। उस्ताद जाकिर हुसैन मशहूर तबला वादक उस्ताद अल्लाह रक्खा हुदं जेष्ठ पुत्र हे ते उंदा जन्म 9 मार्च 1951 च मुंबई च होआ हा। जाकिर हुसैन होरें गी 1986 च पद्मश्री, 2002 च पद्म भूषण ते 2023 च पद्म विभूषण कन्नै सम्मानित कीता जाई चुके दा ऐ।

<><><><><><>

Maha Assembly

महाराष्ट्र विधानसभा दा स्याले आला इजलास अज्जै थमां शुरू होआ'रदा ऐ जेह्दे च मंत्रिमंडल च शामले कीते गेदे नमें मंत्रिएं दा तारुफ कराया जाग ते कन्नै गै इस ब'रे लेई पूरक ग्रांट मंगा बी सदन च रखियां जांगन। सत्ताधारी महायुति सरकार दी कैबिनेट दा कल विस्तार कीता गेआ जेह्दे च कुल 39एं मंत्रिएं औह्दे ते राजदारी दी सगंध चुक्की ही। नमें मंत्रिमंडल च बीजेपी दे 16 कैबिनेट मंत्री, शिवसेना दे 9 ते एनसीपी दे 8 कैबिनेट मंत्री शामिल कीते गे न। कल संजा नागपुर च इक प्रेस कांफ्रेंस गी संबोधत करदे होई मुखमंत्री देवेन्द्र फडणवीस होरें दस्सेआ जे विधानसभा दे इस इजलास दरान कुल 20 बिल पेश कीते जांगन।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम "तन की बात" राएं औंदी 29 दिसम्बर गी देश विदेश च रौहने आले श्रोताएं कन्नै अपने बचार सांझे करगंन। हर म्हीने दे खीरी ऐतवारें बडलै 11 बजे प्रसारत होने आले इस कार्यक्रम दी एह 117महं किश्त होग। कार्यक्रम च शामिल कराने लेई लोक अपने बचार टोल फ्री नंबर 1800-11-7800 पर फोन करियै जां फही नरेन्द्र मोदी ऐप जां MyGov ओपन फोरम पर बी इस म्हीने दी 27 तरीक तगर भेजी सकदे न। मन की बात दा प्रसारण आकाशवाणी ते दूरदर्शन दे समूलचे नेटवर्क पर कीता जाग। एह्दे इलावा एह प्रसारण ए.आई.आर न्यूज वेबसाइट ते न्यूज़ ऑन ए.आई.आर मोबाइल ऐप उपलब्ध होग। एह्दे कन्नो कन्नी ए.आई.आर न्यूज़, डी.डी न्यूज़, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी एह्दी लाइव स्क्रीनिंग उपलब्ध होग। आकाशवाणी दे सब्बने स्टेशनें परा मन की बात दे प्रसारण दे तुरत परैंत उत्थूं दी मकामी भाषाएं च एह्दा प्रसारण बी कीता जाग।

<><><><><><>

Hockey

भारत नै महिला जूनियर एशिया कप हॉकी चैंपियनशिप जित्ती लैती ऐ। जंदी रातीं ओमान दी राजधानी मस्कट च खेड्डे गेदे फाइनल मकाबले च भारत नै चीन गी 3–2 कन्नै हराइयै खताब पर अपना कब्जा बरकरार रखेआ। शूट आउट च साक्षी राणा, इशिका ते सुनेलिता टोप्पोद नै गोल कीते जिसलै जे भारतीय गोलकीपर निधि नै पेनल्टी शूटआउट च त्रै गोल बचाए। एह्दे शा पैहले जिन झुआग नै चीन लेई मैच दा पैह्ला गोल कीता भारत दी कणिका सिवाच नै त्रीए क्वार्टर च गोल करियै मैच बरोबरी पर लेई आंदा। मित्थे गेदे समें च 1–1 दी बरोबरी दे बाद मैच दा फैसला शूट आउट कन्नै करना पेआ। “हॉकी इंडिया” नै इस शानदार जित्त लेई टीम दे हर इक खडारी गी 2–2 लक्ख रपे ते सैहयोगी स्टाफ गी 1–1 लक्ख रपे दी रकम इनाम दे तौरा पर देने दी घोषणा कीती।

<><><><><><>